

LIJE'E SAN PABLO LINIĒ'EPOLA' LAPIMAYE LEFOT'LEPOĽTSI LILYA' ÉFESO

1 Iya' ninPablo, nin'apóstol, Jesucristo alummepa. ToĽta'a ixpic'epa ĽanDios. Iya' quiniĕ'elhuo' imanc', unc'aipimaye noĽmana' liĽya' Éfeso. Imanc' noĽhuaiyijmpá ĽanDios, i'huexi iĽque. Jesucristo joupa epenufpolhuo'.

²ĽanDios caĽAilli' y ĽaĽPoujna Jesucristo titoc'itsolhuo', tipaxnetsolhuo', tipac'e'etsolhuo' loĽpicuejma'.

³AĽ'najtsi'ite ĽanDios, iĽque enDios i'Ailli' ĽaĽPoujna Jesucristo. IĽque joupa aĽpaxneponga'. Cal Espíritu Santo lapi'inga' jahuay al c'a lopa'a lema'a. IĽe al c'a ĽanDios tixina joupa i'ipa aĽ'huexi illanc' naĽhuaiyijmpá Jesucristo.

⁴Cacua: ĽanDios aĽpaxneponga'. Ai'a tilanc'e'ma li'a Ľamats' ĽanDios aĽ'huijĕ'eponga', limetsaicoponga' to joupa lapenufponga' Cristo. Ixpice'epa laĽ'iyaconga'. Ixpice'epa te ts'i'ic' maĽsinyaconga' litine lacaxhuoĽaitsa jiĽpe pe lopa'a. JiĽpe litine aĽmujtoĽtsi aĽinca i'huexi ĽanDios. AĽmujtoĽtsi joupa i'ipa pangay c'a laĽpicuejma', ailopa'a caĽjunac', acueca' aĽ'eta capic'a ĽanDios.

⁵ĽanDios aĽ'eponga' capic'a. Toliya ixpic'epa aĽ'itsonga' inaxque', iĽque ti'iĽa' aĽ'Ailli'. Ixpice'epa toĽta'a lapenuftonga' illanc' naĽ'huaiyijmpá Jesucristo. IĽe lixpice'epa ma letenĽocopa maĽque quituca'. ⁶ToĽta'a tixinim'me acueca' ĽanDios. AĽsininnonga' acueca' laĽpaxneponga', acueca' laĽtoc'iponga' illanc' lapenufponga' Cristo, iĽque i'Hua ĽanDios Ľipic'a.

⁷IĽque hi'Hua ĽanDios joupa lapenufponga'. ToĽta'a ĽanDios limenc'e'ecoponga' lixcay laĽ'epa. AĽsimponga' joupa i'najtsempa laĽjunac'. Cristo, litine lixcuajaipa lijuats', i'najtsepa. Ľinca a'i huata iĽe laĽtoc'iponga' ĽanDios. Acueca' juaiconapa ac'a laĽ'eponga'. ⁸Acueca' lipicuejma' ĽanDios. Ixina' lo'eya, lo'epa. Ailopa'a caĽcuanac'eponga', acueca' laĽpaxneponga'.

⁹Joupa aĽmuc'iponga' te ts'i'ic' lixpice'epa. Li'ipa tocomma to emiya lataiqui'. Itsiya a'i. Icuaiti litine letenĽocopa ĽanDios iĽque aĽmuc'iponga'. ¹⁰AĽmuc'iponga' te lo'iya Cristo, iĽe joupa ixpic'epa ĽanDios. Ma mi'hua menant'hi litine tixhuaiti jahuay, ti'hua tuya'am'me

ite lataiqui'. Tijoula' jahuay
tihuejco'me Cristo, jahuay lopa'a
lema'a, jahuay lopa'a li'a lamats'.

¹¹Linca, jahuay tihuejco'me Cristo.
Maŕque Cristo nalapenufponga'.
Toŕta'a LanDios aksinninga' ixanuc',
i'huexi. Iŕque joup'a a'huif'eponga'
a'itsonga' toŕta'a. LanDios ja'ni
tixpic'eŕa' ti'ila', ma toŕta'a ti'l'ma.
Iŕque tixhuai'ni'ma jahuay lipic'a'.
¹²Ipic'a timetsaiconte anDios.
Tixinninte acueca' lipicuejma'
jouc'a lo'epa. Tix'najtsi'ite. Toŕiya
a'huif'eponga' illanc' petsi luyaiŕa
quitine a'huaicoyi ticuaiyunni cal
Cristo.

¹³Imanc' jouc'a o'huaiyijmpá
Cristo. Ate'a oŕquim'f'epá al Linca
Cataiqui'. Maŕe Lataiqui' loya'apa ite
al c'a lixpice'epa LanDios, tuya'e' te
ts'i'ic' mon'eyacu ja'ni tolunŕul'me.
Lijou'ma o'huaiyijmpá Cristo,
LanDios epi'ipolhuo' h'Espíritu
ma to lijoupa licupa cataiqui'
tepi'itsolhuo'. Iŕque h'Espíritu
ŕepi'ipolhuo' maŕque cal Espíritu
Santo. Toŕta'a i'huáquilhuo' imanc'
ma' alinca ixanuc' LanDios, i'huexi
iŕque. ¹⁴Maŕmana' fa'a li'a lamats'
illanc' ma' i'huexi LanDios. Tijoula'
lunŕu'etsonga', lapenuftonga'
nulemma. Joup'a aŕmuc'iponga'
alinca toŕta'a laŕiyaconga'.
Aŕmuc'iponga' aimafel'miyaconga'.
Toŕiya lapi'iponga' cal Espíritu
Santo. Litine lapenuftsonga'
timetsaicom'me ma' anDios, acueca'
lo'epa.

¹⁵⁻¹⁶Toŕiya iya' cax'najtsi'i
LanDios. Aŕmimpa: "Iŕne lun Éfeso
ti'huaiyijnyi laŕPoujna Jesús, ti'eyi
capic'a liŕpimaye, iŕne jouc'a i'huexi
LanDios". Aimafsoŕpa. Ti'hua

cax'najtsi'i. Ma capalaic'o LanDios
caxahue'e titoc'itsolhuo'. ¹⁷Cacua:
Caxahue'e LanDios titoc'itsolhuo',
tipaxnetsoŕhuo' cal Espíritu Santo.
Iŕque tepi'itsolhuo' coŕpicuejma',
ti'ila' coŕsina' te ts'i'ic' LanDios
lipicuejma', xonca tolimetsaico'me
iŕque. Iŕque LanDios ma' enDios
laŕPoujna Jesucristo jouc'a i'Ailli'.
Toŕta'a iŕque Jesús imuj'moxi ituca'.
Imuj'moxi ma' anDios.

¹⁸Ja'ni tepi'itsolhuo' toŕta'a
loŕpicuejma' jouc'a tepalc'o'i'molhuo'.
Toŕta'a a'i ma le'a moŕhuaicoyacu
tolapenuftsa al c'a, jouc'a ti'l'ma
coŕsina' te ts'i'ic' lapi'iyacolhuo'
LanDios. Ti'l'ma coŕsina' te ts'i'ic'
al cueca' al c'a tolapenufta. Iŕe
finca acueca' ac'a juaiconapa.
Ailopa'a co'onŕcoya. Linca imanc'
tolapenufta. Jouc'a jahuay iŕniya pe
LanDios i'epola' i'huexi, tepenufta
lapi'iyacola' LanDios linaxque'.

¹⁹Jouc'a ti'l'ma coŕsina' te ts'i'ic'
al cueca' lo'epa LanDios. Ti'l'ma
coŕsina' icueya limane. Toŕsinguf'me
acueca' titoc'i'molhuo', acueca'
tipaxne'molhuo' ma moŕhuaiyijnyi.

²⁰Linca, LanDios joup'a imujpa
acueca' juaiconapa lo'epa. Joup'a
i'epa acueca', imaf'i'inapa Cristo.
Ipa'anapa pe lomana' limanapola'.
I'ac'enapa al toncay lema'a.
Icutsupa al c'a camane. ²¹Ailopa'a
co'onŕcoya to iŕque Cristo. Iŕque
xonca acueca', xonca acueca' ti'hua
limane, xonca acueca' lo'epa, xonca
acueca' locuxepa, xonca acueca'
lipuftine. Ja'ni itsiya litine o
locuaicoya locuena quitine, maŕque
Cristo tuliŕqui jahuay. ²²⁻²³LanDios
joup'a ixpic'epa jahuay tihuejcoŕe
Cristo, iŕque Incuxepa, ticuxe

jahuay. ÑanDios epi'ipa lixanuc',
ihne lefot'lepola'. Hque copa'a
ihjuac, ticuxela' ihne icuerpo. Jiłpe
timujyoxi ÑanDios. Linca ÑanDios
ni petsi tipa'a, timujyoxi. Jiłpe
lixanuc', ihne icuerpo Cristo, xonca
timujyoxi.

2 Imanc' ai'a tolapenuf'me al ts'e
lołpitine joupa ejac'polhuo'.
Aimon'eyi locuxepa ÑanDios.
Ton'eyi lixcay. ²Toluyalaicoyi anuli
ihne locuenaye xanuc' nomana'
fa'a li'a łamats'. Olihuejco'me
hłpincuxepa contahue. Ihne
lontahue nomana' jiłpe lema'a
xonca a'ojca, a'i pe lopa'a ÑanDios,
ticuxeyi hłpicuejma' lan xanuc'
petsi aimihuejcoyi ÑanDios.
³ÑanDios ałsimponga' illanc' ma'
anuli aicalihuequi. Imanc' illanc',
luyaipa quitine luyalaicoyi lapajnya
małeyi lałjanajpa. Lihuejcoyi
lojanajpa lałcuerpo. Illanc' całtuca'
ałspic'eyi lałeyacu. Małmana'
tołta'a ailopa'a al ts'e lałpitine. Ma'
anuli locuenaye petsi aimihuejcoyi
ałtełmi'monga' ÑanDios.

⁴Linca, ÑanDios juaiconapa
ac'a lipicuejma'. Ałsimponga'
ninc'icuanuc'la. Acueca' juaiconapa
ał'eponga' capic'a. ⁵Illanc' ma
aimalihuejcoyi, joupa lajac'epołtsi.
Tama tołta'a lałejma' ihque
lapi'iponga' al ts'e lałpitine.
Ałmaf'i'inałponga' anuli Cristo.
Tołta'a lałtoc'iponga' ÑanDios,
lałpaxneponga', joupa lunu'eponga'.
⁶Ma' anuli Cristo lacaxunaponga',
lipa'aponga' pe lomana' lomanapola'.
Ma' anuli ihque ałcutsunaponga'
jiłpe lema'a. Lapenufponga'
Jesucristo, tołiya ał'iponga'
tołta'a. ⁷Ticuaitsi Locuaicoya

Quitine ÑanDios timuj'ma acueca'
juaiconapa ałtoc'iponga', acueca'
ałpaxneponga' illanc' ixanuc' Cristo,
lapenufponga' ihque. ⁸Cacua:
“ÑanDios joupa itoc'ipolhuo',
ipaxnepolhuo', unu'eapolhuo'”. Linca
imanc' aimi'iya molunu'eyacołtsi.
Ma ÑanDios imetsaicopolhuo'
toł'huaiyijnyi. Tołta'a ma' ihque
unu'eapolhuo'. ⁹Linca ailopa'a
cal'eyacu, ni illanc' ni imanc'.
Aimi'iya małnesyacu: “Joupa ai'epa
al c'a, tołiya ÑanDios lunu'e'ma.
Iya' ninc'a.” Ailopa'a conescoyacołxi
tołta'a.

¹⁰Cristo joupa lapenufponga'.
Tołta'a ÑanDios ałanc'e'eponga'
lałpicuejma', lapi'iponga' al ts'e
lałpitine. Tołiya ti'i'ma ał'e'me al c'a.
Ał'e'me małe al c'a lixpice'epa ÑanDios
ał'ete. Tołta'a ixpic'epa luyalaicołe.

¹¹Tołiya aimolimenc'eco'me te
ts'i'ic' lipaxnepolhuo' ÑanDios.
Tołnujuaisle te ts'i'ic' li'ipa
li'ipolhuo'. Imanc' a'i cunc'ijudío,
ituca' lołnación. Aiquetec'ennilhuo'
lołpixic'. Tołta'a lan xanuc' judío
tetets'ilhuo', tecui'ilhuo': “Ihne
petsi ailopa'a quihseña, petsi
aiqui'ennila' circuncidar”. Ihne lan
judío joupa i'empola' circuncidar,
joupa etec'empola' hłpixic'. ¹²Ihniya
hitiné aicun'ejmale Cristo. Lan
xanuc' Israel imetsaiconnila'
ixanuc' ÑanDios, imanc' ai, imanc'
unc'ocuenaye xanuc'. Ihne lun Israel
ÑanDios joupa imanekonca cataiqui'.
Nulemma icupa cataiqui' tepi'i'mola'
al c'a. Imanc' aicolapenufi ih
lataiqui'. Ihniya hitiné imanc'
ailopa'a col'huacoyacu. Fa'a li'a
łamats' ma toluyalaicoyi lapajnya.
Aicolimetsajma ÑanDios.

¹³Itsiya joupá ipaicopa ite loḥpepajnya. Joupá epenufpolhuo' Jesucristo. Li'ipa tocomma to toḥmana' aculi', aimi'ya moli—loc'olaiyacu ÑanDios. Cristo joupá ixcuajaipa lijuats' i'najtsepa loḥjunac'. Toḥta'a itoc'ai'epolhuo' ÑanDios. ¹⁴Maḥque Cristo ipac'epa lafuleya. Itsiya illanc' ninc'ijudío jouc'a imanc' a'i cunc'ijudío ma maḥmana' anuli. Ailopa'a tintsi. Li'ipa tipa'a laḥpa'neponga'. Itniya hitiné aicaḥejmale, aici'ic'. Licupoxi Cristo tēpaḥts'ijnle licuerpo jilḥpe lancruz, itque etēpa ite laḥpa'neponga', itonc'epa nulemma.

¹⁵Itē laḥpa'neponga' itaiqui' Moisés licuxepa. Jilḥpe inihijmpa anuli anuli te ts'i'ic' malihuejcoyacu ÑanDios. Limapa jilḥpe lancruz Cristo itonc'epa limane ite lataiqui'. Itsiya aimi'ya maḥpa'neconayaconga'. Imanc' illanc' aḥ'e'eponga' to anuli cal ts'e xans. Lapi'iponga' al ts'e laḥpicuejma'. Toḥta'a ipac'epa lafuleya. ¹⁶Itsiya aima'econayacoḥtsi laic'. Itē lixcay laḥpicuejma' Cristo ima'apa ite litine lepāts'ingimpa jilḥpe lancruz. Ma maḥsinyoḥtsi ituca' ituca' laḥpicuejma' aimi'ya maḥejmaleyacu ÑanDios. Cristo aḥ'e'eponga' anuli. Ma aḥmana' icuerpo itque. Toḥta'a aḥejmale ÑanDios.

¹⁷Li'huamma Cristo uya'apa joupá ipac'epa lafuleya. I'huamma ti'itā' coḥsina' imanc' noḥmana' aculi', jouc'a ti'itā' quihina' petsi xonca ahuejnca ÑanDios, itsiya ailopa'a tintsi. ÑanDios tepenufila' jahuary lan xanuc' ma' anuli. ¹⁸Ma' itque Cristo ticu lane aḥpalaic'olē ÑanDios caḥ'Ailli', li—loc'olai'me imanc' y

illanc'. Joupá lapenufpá cal Espíritu Santo. Toḥiya lapenufinga' ÑanDios.

¹⁹Itsiya aimi'ya mecui'inyacolhuo' “aine”, o “itne ocuenaye xanuc'”. Itsiya imanc' illanc', jouc'a jahuary laḥpimaye, joupá aḥ'e'eponga' i'huexi ÑanDios. Tipa'a laḥpiḥya' pu'hua lema'a. Ma ÑanDios aḥ'Ailli'. ²⁰Ma to lipangopa lo'huaiyijmpa lan apóstole, lam profeta, ma' anuli oḥpango'me imanc'. Maḥ cataiqui' olapejpa.

To anuli cal cueca' capic lipo'nof'impá itaḥta' cajut'ḥ, itque laḥpic nolanc'epa lajut'ḥ aimecangeya, toḥta'a lo'onḥcospa Jesucristo.

²¹Petsi lepenufpola' itque laḥPoujna Cristo, itne ti'onḥcospa to anuli al paxi cajut'ḥ tilanc'econni apic'. Ina'a lapic' tipo'nof'inni anuli anuli pe lo'eya quipenic'. Maḥque Cristo, to cal Cueca' Capic, ipulaic' itaḥta'.

²²Jouc'a imanc' lepenufpolhuo' Cristo, tipo'no'innilhuo' pe lon'eyacu canic'. Toḥta'a tilanc'enni lejut'ḥ ÑanDios. Jilḥpe copa'a cal Espíritu Santo, itque ma' anDios.

3 Itsiya ca'njuaitis'ilhuo' ite al cueca' lipaxnepolhuo', al cueca' li'e'epolhuo' ÑanDios. Iya' ninPablo aitoc'i'molhuo' imanc' pe a'i cunc'ijudío. Nu'i'molhuo' naitsi cal Cristo, itque Jesús. Itē aipenic'. Toḥiya itsiya altats'ya.

²Joupá oḥsina' toḥta'a laipenic'. ÑanDios aḥpaxnepa, alapi'ipa laipenic', cuya'ala' Lataiqui' ni petsi loḥmana' imanc' pe a'i cunc'ijudío.

³Oḥsina' ma ÑanDios aḥmuc'ipa Lemiya Cataiqui'. Itā'a coḥje'e joupá nini'epolhuo' oque' afane' lataiqui' lonescopa ite Lataiqui' lemiya.

⁴Moḥsuef'yi ite lainini'epolhuo'

ti'ila' cołsina' ałınca cacueca Lemiya Cataiqui', iħe lonescopa Cristo.

⁵Luyaipa quitine lan xanuc' aiqũsina' iħe lataiqui'. Itsiya ŁanDios jouspa imuc'ipola' li'apóstole jous'a liprofeta, iħne i'huexi. Cal Espĩritu Santo ałmuc'iponga'.

⁶Ałmuc'iponga' te ts'i'ic' lo'iyacolhuo' imanc' a'i cunc'ijudío pe no'epá ĩnca Lataiqui', jouspa epenufpolhuo' Cristo. Imanc' illanc', ŁanDios limetsaiconga' inaxque'. Ałsinninga' jouspa a'iponga' to anuli al cuerpo. ŁanDios jouspa icupa cataiqui', ałmiponga' ałtoc'i'monga' illanc' ninc'ijudío. Itsiya maħe lataiqui' timilhuo' imanc', ma' anuli ałtoc'i'monga' illanc' imanc'. Ma' anuli lalapi'iyaconga'.

⁷Iya', ŁanDios lapi'ipa laipenic' cuya'ała' Lataiqui' loya'apa iħe al c'a lixpice'epa ŁanDios. Ałpaxnepa, lapi'ipa laipicuejma'. Lałpaxnepa tołta'a aixinguf'ma acueca' icueya limane ŁanDios. ⁸A'i ca'onłicoyacoxi to laipimaye, iħne jous'a i'huexi ŁanDios. Ja'ni anuli iħniya tixinyoxi aca'hua xans iya' cacua: Iya' ajna'hua capima xonca. Ma ŁanDios ałpaxnepa, lapi'ipa laipenic' ca'huała' pe lomana' lan xanuc' a'ij judío, jĩłpe capalaicotsi Cristo, cuya'atsi te ts'i'ic' iħque lipicuejma'. ĩnca juaiconapa xonca acueca' ac'a lipicuejma', ailopa'a co'onłcoya. Aimi'iya micuec'eyacu nulemma.

⁹ŁanDios lapi'ipa laipenic' camuc'itsola' acuajmaica Lemiya Cataiqui'. Ti'ila' quĩsina' lan xanuc' te ts'i'ic' menant'liya Lataiqui' lonescopa. Lipangopa lilanc'epa li'a łamats', Lemiya Cataiqui' jouspa tipa'a jĩłpe lipicuejma' ŁanDios.

Iħque jouspa ixpic'epa lo'eya. Małque ŁanDios ilanc'epa jahuay. ¹⁰Cacua: ŁanDios lapi'ipa laipenic'. Tołta'a tefot'hela' lixanuc'. Tixintsa lapaluc' quema'a te ts'i'ic' lipicuejma'. Iħne lan tsila' capaluc' nomana' lema'a, pe acueca' icueya liħmane, ticuxeyi jĩłpe, małniya itsiya tehuelonginnila' lixanuc' ŁanDios lefot'hẽpola'. Mehuelojnyi ti'i'ma quĩsina' te ts'i'ic' litoc'ipola', lipaxnepola' ŁanDios lixanuc'. Iħne lixanuc' anuli anuli ocuena ocuena liłpicuejma' lepi'ipola' ŁanDios. Tołta'a ma quefołya timujyi te ts'i'ic' al cueca' lipicuejma' ŁanDios.

¹¹ŁanDios al cołta ixpic'epa ti'ila' quĩsina' tołta'a lapaluc' quema'a, tołiya' lepi'ipa lipenic' Jesucristo, iħque ałPoujna. ¹²Cristo jouspa lapenufponga'. Tołta'a tixoqui calata aliłoc'ołaiyi ŁanDios. Ma mał'huaiyijnyi Cristo aimasuełmot'hẽyi, ailopa'a całpa'neyaconga'. ŁanDios lapenufinga'.

¹³ĩnca acueca' iħe lataiqui' laifnuya'apa. Tołiya caxa'huelhuo', camilhuo': Aimosuełmot'hẽco'me. Aimosnes'me: "Acuanuc' Pablo, acueca' juaiconapa lotelcopa". Aimolpai'i'mołtsi lołpicuejma'. Toł'nujuaisle: Ja'ni coła' iya' aicatelma, coła' ailopa'a mipaxneyacolhuo' ŁanDios.

¹⁴Ma ca'nujuaisilhuo' al cueca' lipaxnepolhuo' ŁanDios, iya' caxc'onłingay cał'Ailli'. ¹⁵Fa'a li'a łamats' lanaxque' mecui'innila' quĩtatá "ał'ailli'", o mecui'iyoltsi tołta'a iħne nomana' lema'a, ĩpe qui'huayomma iħe lataiqui' o iħe liħejma'? ĩTe qui'ipa limetsaicopoltsi

tofta'a? Tofta'a maŕque ÑanDios ecui'ipoxi.

¹⁶ Ìŕque ñinca ma' anDios. Aimehue'e'. Ixhueya lipicuejma', acueca' icueya limane. Toliya caxahue'e' titoc'itsolhuo'. Caxahue'e' titoc'itsolhuo' h'Espíritu, ti'ila' acueca' loŕpicuejma', jouc'a tonŕ'e'me al cueca'. ¹⁷ Ja'ni tofta'a lotoc'ipolhuo' itine itine toŕ'huaiyijm'me cal Cristo, ìŕque tipajm'ma òlunxajma'. Tepi'i'molhuo' coŕpicuejma' toŕ'etsoltsi capic'a. Tifa'e'molhuo' loŕpicuejma'. ¹⁸ Tofta'a aimimajaiqueyacolhuo'. Imanc' jouc'a jahuay lixanuc' ÑanDios, ìŕne i'huexi ìŕque, ti'i'ma coŕsina' nulemma te ts'i'ic' litoc'ipolhuo' ÑanDios. Ja'ni to'huaŕa' lexpats'qui o lipitoqui li'a ŕamats', o taimutsi al 'ocay, o tof'ajla' al toncay, ni petsi loŕtseyá aimoxinya Lataiqui' xonca' acueca', ailopa'a. ¹⁹ Caxahue'e' tolimetsaicoŕe te ts'i'ic' mi'nujuaitsilhuo' Cristo. Ñinca, aimi'ya moŕcuejyacu nulemma. Juaiconapa acueca' ti'elhuo' capic'a.

Ja'ni tofta'a lotoc'ipolhuo' ÑanDios ti'hua ti'i'ma ixhueya loŕpicuejma'. Ti'i'ma to lipicuejma' ÑanDios. ²⁰ Ìŕque ÑanDios ti'ay al cueca'. Aimi'ya maŕsinyacu nulemma lo'eya. Ja'ni aŕsa'hueŕe o jìŕpe laŕpicuejma' aŕnesle: "Aipic'a aŕtoc'ila' acueca'", ñinca xonca acueca' aŕtoc'i'monga'. Tofta'a aŕtoc'inga' cal Espíritu Santo, ìŕque ñalapenuŕpa.

²¹ iMaŕque ÑanDios aŕs'naŕtsi'ìŕe! Cristo timuqui te ts'i'ic' ÑanDios lipicuejma'. Ma' anuli timujiy lixanuc' ÑanDios leŕot'lepola'. Amats' amats' ti'i'ma tofta'a. Jouc'a

Locuaicoya Quitine ti'hua ti'i'ma, aimijouya. Tofta'a ti'ila'. Amén.

4 Iya', ma ca'ay lanic' lalapi'ipa ñaiPoujna, aŕ'notimpa. Itsiya capa'a aŕtats'iya. Fa'a caxc'ai'ilhuo' lonŕ'eyacu. Imanc' joupa ijoc'ipolhuo' ÑanDios, imanc' ixanuc' ìŕque. Camilhuo': Toŕmujtsoŕtsi ixanuc' ÑanDios. ² Aimoŕ'nof'e'moŕtsi. Aimoŕtalai'otŕ'e'me ÑanDios ni moŕtalai'otŕ'e'mola' lan xanuc'. Toŕsnet'He lo'e'epolhuo'. Amolixtuc'o'moŕtsi, toŕ'etsoltsi capic'a. ³ Cal Espíritu Santo joupa i'e'epolhuo' anuli. Toŕpo'noŕe loŕpicuejma' ti'hua toŕ'e'moŕtsi tofta'a. Ja'ni aimoŕfuleyi ñinca toluylaico'me anuli loŕpicuejma'.

⁴ Illanc' petsi naŕ'huaiyijmpá Cristo aŕ'onŕcosponga' to licuerpo. Ìŕque licuerpo anuli le'a. Anuli cal Espíritu mipa'a jìŕpe, ìŕque cal Espíritu Santo.

ÑanDios aŕjoc'iponga' aŕ'huaicoŕe ìŕe lalapi'iyaconga'. Ma' anuli lapi'itonga' jahuay illanc'. ⁵ Anuli ñaiPoujna, ma' anuli lataiqui' laŕ'huaiyijmpa, anuli lalapocopa. ⁶ Anuli ñalanDios, ìŕque iŕ'Ailli' jahuay. Ìŕque xonca cal Cueca', jahuay tixhuai'niyi lixpice'epa, jahuay illanc' aŕmana' pe lipanga.

⁷ Ñinca tama jahuay illanc' aŕmana' pe lipanga ÑanDios aŕij nuli ìŕe laŕpaxneponga'. Ituca' ituca' laŕpaxneponga' Cristo. Ìŕque tixpique. Anuli anuli lapi'iponga' laŕpenic'. ⁸ Tofta'a loya'apa ÑanDios jìŕpe al Paxi Ñinŕingiya, ticua:

Ìŕ'ajnapa lema'a, miŕ'aquinghua ilecopola' lixanuc', ìŕne li'ipa litats'ila' joupa ux'masquem'mola'.

Lijou'ma ica'ne'mola' lixanuc'
lapi'iyacola', tepenufle.

⁹Joupa alcua'pá: "If'ajnapa". Ai'a
tif'aj'ma imumma, imuyomma
jilpe al 'ocay li'a lamats'. Lijou'ma
if'ajna'ma, icuaita pe lopa'a al
te'a. ¹⁰Ihque nimumma, nif'ajnapa
ma' anuli ihque. If'ajnapa lema'a
xonca al toncay. To'ta'a aimi'iya
minesquinyacu: "Fa'a ailopa'a". Ni
petsi, ja'ni lema'a, ja'ni li'a lamats',
ihque tipa'a, ticuxe.

¹¹Lijoupa lif'ajnapa al toncay
lema'a, Cristo epi'ipola' lixanuc'
ituca' ituca' lihpenc'. To'ta'a timana'
lan apóstole, timana' lam profeta,
timana' lan evangelista, ihne
noya'apá Lataiqui', timana' lam
pastor, ihne no'epá cuenna lihpimaye,
timana' lomxiye, ihne tuhuatyi
Lataiqui', timuc'iyaleyí.

Jahuay ihniya Cristo epi'icopola'
lixanuc', titoc'itsola' ihne lefot'epola'
ŁanDios. ¹²Ihne no'epá lanic' ti'hua
titoc'innila' lihpimaye, tifa'ennila'
lihpicuejma'. Tijoula' jahuay
lapimaye, ihne i'huexi ŁanDios,
ti'ima pangay c'a lihpicuejma',
aimehue'eyacola'. ¹³To'ta'a jahuay
illanc' na'huaiyimpá Lataiqui',
alcuec'e'me nulemma loya'apa ihne
Lataiqui', limetsaico'me nulemma
te ts'i'ic' lipicuejma' hi'Hua
ŁanDios. Tijoula' ańnesco'mo'tsi:
"Joupa ałto'jpa". He litine
lałpicuejma' ti'ima pangay c'a,
joupa ilajmpa. Cristo mane ac'a
lipicuejma', aimehue'e'. Jouc'a
aimalahue'eyaconga'. ¹⁴ŁanDios
joupa lapi'iponga' ihne lałtoc'iponga',
ałmuc'itsonga' lihuejle. ŁanDios
aimicua maluyalaicoyacu
ma' onłcoyaconga' to la'uhuay, ihne

lihpicuejma' tife'ne'mola' ni cua tints
cataiqui'. Aimicua małfel'miyaconga'
lan xanuc' petsi acueca' quixcay
lihpicuejma'. Ihmaf'i' ihniya, ihcina'
lo'eyacu tifel'miyale'me. Ihne
joupa imenajpola'. Tihuejyi ituca'
cataiqui'. ¹⁵ŁanDios xonca ipic'a
lihuejle al Linca Cataiqui'. Ma'ela'
capic'a lałpimaye, ma' ihne Lataiqui'
luya'a'me. To'ta'a ti'hua tilajm'ma
lałpicuejma', ti'ima pangay c'a,
ti'onłcota to Cristo lipicuejma'. Ihque
ałjuac, illanc' icuerpo.

¹⁶Cristo lałjuac ałtoc'enga'
illanc' icuerpo. Anuli al cuerpo
axpe' mipa'a. Ihne aimitoqui anuli
anuli. Jahuay ihniya titojyola' pe
lomana'. Litornillo lajonłyopola'
jahuay. To'ta'a tites'miyotłsi,
titoc'iyotłsi. Ihiya ał'onšponga'
illanc' icuerpo Cristo. Ma'eyotłsi
capic'a ałtoc'iyotłsi, ałfa'e'mo'tsi
lałpicuejma'.

¹⁷Joupa aixc'ai'ipolhuo',
aimipolhuo': "Tołmujtsołtsi ixanuc'
ŁanDios". Illanc' ninc'apimaye,
ma' anuli lałPoujna. Toliya
caxc'ai'icona'molhuo', camilhuo': Ma
monluyalaicoyi lapajnya aimo'e'me
to mi'eyi ihne petsi aimimetsaicoyi
ŁanDios, ihne naihuejpa
latenłcocopola' quiltuca'. Aimihuejyi
latenłcocopa ŁanDios. ¹⁸I'ipa
muf lihpicuejma'. Aimicuec'eyi,
to'ta'a enaj'mo'tsi ŁanDios. Joupa
ejac'epołtsi. Lihpicuejma' i'ipa
to lałpic. ¹⁹Aimi'iya mixinyacu
calaic'ata. Icupołtsi ti'ełe al
xujc'a, ti'ełe nixpiya. Aimicuayi:
"Aimałecona'me to'ta'a". Ma ti'hua
tehueyi xonca nixpiya lo'eyacu.

²⁰Ai to'ta'a lipalaic'ocompolhuo'
Cristo. Ai to'ta'a lipicuejma'

iñque. ²¹ ¿Te aicołcueca litaiqui'?
 O ¿aiquepenufilhuo' iñque?
 Małmuc'ilhuo', małpalaicoyi iñque
 Cristo, ¿te aicałnesqui al linca?
²² Ai'a ti'i'ma al ts'e lołpitine
 tolihuejcoyi cołtuca' lołpicuejma'.
 Jiłniya hitiné ti'hua tołajac'eyołtsi,
 ti'hua tołfel'miyołtsi, tołjanajyi
 tonł'ete nixpiya. Tolta'a tolihuejyi.
 Joupa lu'ipolhuo': "He lonł'epa li'ipa,
 tołpo'nołe nulemma". ²³ Itsiya tipa'a
 al ts'e lołpitine. Cal Espíritu Santo
 tipa'a jiłpe lołpicuejma'. Itine itine
 tolapenufle cołpujfxi lapi'ipolhuo'
 iñque. ²⁴ Tołspic'ete nulemma
 tolihuejcołe al ts'e lołpicuejma'.
 He to lipicuejma' ŁanDios tixpic'e
 ma le'a al c'a, tihuejco'ma ma le'a
 ŁanDios, iñque cal Paxi. Tolta'a
 ate'a ilanc'empa lipicuejma' cal
 xans. Iñque lipicuejma' mane ac'a.
 Ti'onłcospa to lipicuejma' ŁanDios,
 iñque aimifel'miyale.

²⁵ Joupa ołspic'epá
 aimołfel'miyaleconayacu. Ne'.
 Mołpalaic'oyołtsi tołnesle
 ma le'a al linca. Anuli anuli
 tipalaic'ola' tołta'a lipima.
 Aimołfel'miconayacołtsi. ŁanDios
 joupa lafot'leponga' to anuli al
 cuerpo. Illanc' ninc'apimaye.
²⁶ Ja'ni olixıtulepá aimi'hua
 molixıtule'me. Ai'a tipo'nof'caita
 cal 'ora tołpac'ete lołpoyac'. Ja'ni a'i
 ŁanDios aimetenłcocoya iñe lonł'epa,
 tixim'ma a'ijc'a. ²⁷ Ja'ni ti'hua
 molixıtuleyi ma le'a tołapi'iyi lane
 łonta'a Satanás.

²⁸ Łapima pe joupa ihuiyipa, ti'hua
 tinantse, aiminantsecona'ma. Ituca'
 tixhuico'mola' limane', ti'etsi al
 c'a lanic'. Tolta'a ti'i'ma ti'huej'ma.
 Ti'i'ma tepi'i'ma petsi aiqui'hueca.

²⁹ Aimołnes'me camac'ta
 cataiqui', ni anuli. Tołspic'ete al
 c'a lołnesyacu. Tołmi'mołtsi: "¿Te
 cahue'epola' laipimaye?" Lijou'ma
 tołnesle lataiqui' lofa'eyacola'
 liłpicuejma'. Xonca ticuec'e'me.
 Jouc'a ŁanDios tetenłcoco'ma
 lołnespa. Titoc'i'mola', tipaxne'mola'
 noquimf'epolhuo'. ³⁰ Ja'ni tołnesle
 camac'ta cataiqui' tołhuosmi'me cal
 Espíritu Santo, iñque lipaxi Espíritu
 ŁanDios. Aimonł'e'me tołta'a. Imanc'
 joupa olapenufpá cal Espíritu.
 ŁanDios imuc'ipolhuo' imanc' ałinca
 ixanuc'. Tocomma ipo'ninc'e'epolhuo'
 hisello, iñque ołPoujna. Ticuaitisi
 al Cueca' Quitine tepenuftolhuo'
 nulemma, tunłu'etolhuo'.

³¹ Ja'ni tipa'a al cuaj jiłpe
 lołpicuejma' tołipa'ate.
 Aimolixıtuc'ocona'mołtsi.
 Aimołnujuaiscona'me iñe li'ipa
 lolixıtulepa. Aimołjaic'o'mołtsi.
 Aimołnesco'mołtsi a'ijc'a. Tołspic'ete
 nulemma aimoł'econa'me
 tołta'a. Jouc'a jiłpe lołpicuejma'
 aimolatets'icona'mołtsi.

³² Tołpalaic'otsołtsi al c'a,
 tołtoc'itsołtsi, tolimenc'e'ecotsołtsi.
 Imanc' lepenufpolhuo' Cristo,
 ŁanDios joupa imenc'e'ecopolhuo'
 lonł'epa. Tolta'a imanc'
 tolimenc'e'ecotsołtsi lonł'e'epołtsi.

5 Camilhuo': Ti'itsolhuo'
 loł'ejma' to li'ejma' ŁanDios.
 Tołmujtsołtsi to caiquinaxque' iñque.
² Itine itine tołnujuaitsołtsi ma to
 Cristo li'nujuaispolhuo'. Iñque icupoxi
 tima'anłe i'najtsepa lałjunac'. Iñque
 litsufcopoxi etenłcocopa ŁanDios.
 Tołiya limenc'e'ecoponga' lał'epa.

³ Imanc' joupa i'huexi
 ŁanDios, tołmujtsołtsi tołta'a.

Aimolahue'mola' caca'no'.
 Aimon'e'me nixpiya. Ni mon'e'me
 to lo'epa ihniya petsi ti'hua tijanajyi.
 Aiminesyi: "Aima'econa'me
 to'ta'a". Ma ti'hua tehueyi xonca
 nixpiya lo'eyacu. Imanc' ni
 mo'palaico'mola' ihniya lo'epa.
⁴Aimon'e'me ni mo'nes'me al
 xujc'a. Aimolilotsoco'mo'tsi.
 Aimo'palaic'oco'mo'tsi lo'pema'c'ta.
 Iha'a aimetentma. Xonca
 ticuicomma to's'najtsi'ile EanDios.
⁵Ihne petsi nahuepa' caca'no', jouc'a
 petsi axujc'a li'picuejma', jouc'a
 petsi ti'hua tijanajyi xonca, ma'niya
 ti'on'cospola' to naxc'on'gingo'laipa'
 lilendiosla', imanc' joup'a o'sina'
 lo'iyacola'. Nij naitsi ihniya
 notsufaiya pe locuxeyopa Cristo,
 ji'pe locuxeyopa EanDios.
⁶Lan xanuc' no'epa' to'ta'a
 tepi'iyi coyac' EanDios. I'que
 tite'l'mila' ihne lincuej'locale.
 Imanc' aimo'fel'mi'mo'tsi.
 Aimo'quimf'e'mola' nocuapá:
 "Ailopa'a tintsi. Ton'ete ma
 ts'o'pic'a." Ihne mane tipalo'layi. A'ij
 hınca lonespa. ⁷Joupa aimipolhuo':
 Ihne lixcay xanuc' tepi'iyi coyac'
 EanDios. Imanc' aimon'e'me to'ta'a.
⁸Li'ipa, imanc' lo'picuejma'
 mane amuf. Ti'on'cospolhuo' to
 lipuqui'. Itsiya a'i. La'Poujna joupa
 epenufpolhuo', epalc'o'ipolhuo'.
 Moluyalaicoyi lapajnya
 tolapalc'o'itsola' locuenaye. ⁹Petsi
 EanDios joupa epalc'o'ipola'
 li'picuejma', ihne timuj'mo'tsi
 pangay c'a xanuc'. Ti'eyi ma le'a
 al hijca, tihuejyi al hınca. ¹⁰Imanc'
 tolahue'le latent'cocoya EanDios,
 ma'le ton'ete. ¹¹Ihne petsi amuf
 li'picuejma', lo'epa ihniya ailopa'a

al c'a caipammaispa. To ihniya
 aimon'e'me. Tolanaj'mo'tsi. Xonca
 to'tale'mola', to'mujle a'ijc'a lo'epa.
¹²Ihniya juaiconapa axujc'a ile lo'epa
 lemiya, ni aimi'iyi ma'nescoyacu.
¹³Ja'ni lepalc'o' tepalc'o'ila'
 lemiya, ile ti'huá'jta, timuj'moxi
 te ts'i'ic' mipa'a. To'ta'a lo'iya ja'ni
 a'tale'mola' ihne no'epá al xujc'a. He
 lixcay timuj'moxi te ts'i'ic' mipa'a.
¹⁴Mane lepalc'o' tepalc'o'i'ma lemiya.
 To'iya al Paxi Lini'ingiya tuya'e':
 Aimi'hua moxmai'ma, tomaf'ila'.
 Totsahuenni, taipanni,
 topo'notsola' lof'as xanuc', ihne
 no'on'cospola' to limanapola'.
 Tijoula' Cristo tepalc'o'i'mo'.
¹⁵To'po'no'ete cuenna,
 moluyalaicoyi lapajnya tolihuejle al
 c'a. Joupa epi'impolhuo' lo'picuejma',
 aimo'e'mo'tsi to lan mac'ta. ¹⁶Iha'a
 hitiné ipime. Ja'ni ti'i'ma ton'e'me
 al c'a, ne' ton'ete. Aimo'huaico'me.
¹⁷Aimon'e'mo'tsi to lan tonno.
 Ti'ila' co'sina' te ts'ipic'a la'Poujna.
 To'ta'a ton'e'me.
¹⁸Aimo'snatsai'me vino. Ja'ni
 to'snatsaiyi timeyoj'molhuo'. Tijoula'
 ton'e'me nixpiya. Xonca tolap'i'ile
 lane cal Espíritu Santo ti'hua
 micuxelhuo' lo'picuejma'. ¹⁹To'ta'a
 to'palaic'o'mo'tsi al c'a. To'nes'me
 lan salmo, lan himno, lan alabanza.
 Ji'pe to'lunxajma' to'lunac'me,
 to'lunac'co'me la'Poujna. ²⁰Itine
 itine mo'huaiyijnyi Jesucristo
 la'Poujna, ma mo'nesyi i'que
 lipuftine, to's'najtsi'ile EanDios,
 i'que o'Ailli'. Ja'ni ac'a lo'ipolhuo',
 ja'ni a'ijc'a, ma' anuli to's'najtsi'ile.
²¹Imanc' to'cuc'eyi Cristo.
 Jouc'a to'cuc'etso'tsi. ²²Imanc'
 unc'apenoye, anuli anuli

tolihuejcoṭe loṭpe'ailli'. Toṭta'a tolilhuejco'me laṭPoujna. ²³Ṭaca'no' ḥipe'ailli' tocomma to ijuac. Toṭta'a cal xans ti'onṭcospa to Cristo. Illanc' nalafot'ṭeponga' ḲanDios, Cristo aḵjuac. Ḥque alunṭu'eponga' illanc' icuerpo. ²⁴Toṭiya lihuejcoyi, aṭcuxenga'. Ma' anuli laṭpimaye caca'no', ticuicomma anuli anuli tihuejcoṭa' ḥipe'ailli'.

²⁵Illanc' nalafot'ṭeponga' ḲanDios, Cristo aḥ'eponga' capic'a. Ma' anuli imanc' cunc'ape'ailli', tonṭetsola' capic'a loṭpenoye. Cristo maḥ'enga' capic'a icupoxi tima'anṭe, i'najṭsepa laṭjunac'. ²⁶Ipic'a aḥ'eṭsonga' ma' i'huexi ḲanDios. Toṭta'a latufc'eponga' laṭpicuejma' iṭe litine lalapo'icomponga' aja' maḥ'eyi ḥinca litaiqui' ḲanDios. ²⁷Toṭta'a aḥanc'e'enga' laṭpicuejma'. Ti'ṭa' pangay c'a. Ma to anuli cal xans tixoj'ma queta tepenuf'ma quipeno mipa'a ac'a lipicuejma', toṭta'a lapenuftonga' Cristo, illanc' nalafot'ṭeponga' ḲanDios.

Anuli cal ts'e cahuats', licuerpo jouc'a lipicuejma' ailopa'a qui'ic', aimi'iya minesconyacu. Toṭta'a aḥ'onṭcotonga', lapenuftonga'.

²⁸Imanc' cunc'ape'ailli', ma to toṭsinyi acuanuc' loṭcuerpo, ma toṭta'a tonṭetsola' capic'a loṭpenoye. Toṭsintsola' acuanuc'la. Cal xans noximpa acuanuc' ḥipeno, ma' anuli tixinyoxi acuanuc'. ²⁹Anuli cal xans, ṭe ja'ni ti'e'maj laic' licuerpo? A'i. Aimi'iya. Aḥtes'miyi laṭcuerpo, aḥ'eyi cuenna. Ma toṭta'a aḥ'enga' cuenna Cristo, illanc' nalafot'ṭeponga' ḲanDios. ³⁰Illanc' icuerpo Cristo. Aḥ'onṭcosponga' to limane', li'mitsi', y tojua mipa'a laṭcuerpo. Anuli

laṭpoxic', laṭpecaṭ. ³¹Toṭiya al Paxi Linihingiya tuya'e':

Cal xans tipo'no'mola'
quiṭtuca' qui'ailli' qui'máma',
tejonḥi'moṭsi anuli ḥipeno.
Ḥne loquexi' ti'i'mola' ma' anuli,
anuli al cuerpo.

³²Aḥinca acueca' ipime iṭe lataiqui'. A'i ma le'a anuli loya'apa. Ḥe lataiqui' aḥnesconga' illanc' petsi nalafot'ṭeponga' ḲanDios, illanc' icuerpo Cristo.

³³Ḳinca iṭta'a laifxc'ai'ipolhuo' a'i quipime cataiqui'. Camilhuo': Imanc' jouc'a, anuli anuli, tonṭetsola' capic'a loṭpenoye. Ma to tonṭeyoṭsi cuenna imanc' coṭtuca', ma toṭta'a tonṭetsola' cuenna iḥniya. Imanc' cunc'apenoye, tolilhuejcoṭsola' loṭpe'ailli'.

6 Imanc' unc'a'uhuy,
toṭcuc'eṭsola' loḥ'ailli'. Ḥe ac'a cataiqui'. Ma moḥ'hua iyijnyi laṭPoujna ipic'a tonṭeṭe toṭta'a. ²⁻³ḲanDios ticuxe: "Taihuejco'mola' co'ailli', co'máma'. Totoc'i'mola'." Jouc'a icupa cataiqui' ticua: "Ja'ni toṭeṭa' toṭta'a toyaico'ma al c'a. Ticoḥ'mo' axpe' camats' topajm'ma fa'a li'a lamats'." A'i'a tines'ma toṭta'a ḲanDios ailopa'a quicuapa: "Ja'ni toṭeṭa' iṭe laifcuxe'epo' toyaico'ma al c'a". Ḥe lataiqui' al te'a loya'apa toṭta'a.

⁴Imanc' unc'a'ailli' aimolapi'i'mola' coyac' loḥnaxque'. Toṭetsola' cuenna, toṭsc'ai'itsola', tolu'itsola' te ts'i'ic' al c'a lo'eyacu. Ja'ni a'ijc'a lo'epa, toṭtaletsola'. Toḥmi'moṭsi: "LaṭPoujna, ṭe co'eya? O ṭe conesy a iḥque?" Toṭta'a tonṭe'me.

⁵Imanc' cunc'imozó,
tolilhuejcoṭsola' loṭpoujnalá. Tama

ihne of'as xanuc' aimo'nof'e'mo'tsi.
Tolahue'me latentcoyacola'.
Aimo'fel'mi'mola', to'cuc'etsola'.
Ma to mo'cuc'eyi Cristo, ma to'ta'a
to'cuc'e'mola' ihniya lo'poujnalá.
To'tmi'mo'tsi: "Ma cacuec'e i'que
la'poujna to'comma to cacuec'e
Cristo".

⁶⁻⁷Tama tipa'a lo'poujnalá fa'a
li'a lamats' imanc' imozó Cristo,
ton'eyi lo'xic'epa LanDios. To'hiya
aimo'on'hico'mo'tsi to ihniya
lo'eyacu canic' ma le'a mehuelongila'
hi'poujna. Ihne tife'haiqueyi, aimi'eyi
latentcocopa hi'poujna. Imanc'
jahuay lo'lunxajma' tixojla' cunlata
ton'ete canic', ton'ete latentcocoya
la'Poujna. ⁸Imanc' joupá o'sina'
lo'ya. Peci no'epá al c'a, ja'ni
amozó o ja'ni apoujnalá, ma'e al c'a,
acueca' o ahuata, tepi'icona'mola'
la'Poujna.

⁹Joupa aixc'ai'ipola' lam mozó,
ti'ila' li'ejma' to lo'ya li'ejma' lan
c'a mozó. Ma' anuli laifxc'ai'ipolhuo'
imanc' unc'apoujnalá. Camilhuo':
Ti'ila' lo'ejma' to lo'ya
li'ejma' lan c'a capoujnalá.
Aimo'jaic'o'ona'mola', to'snet'He.
To'nujauitsa lo'Poujna, i'que Nopa'a
ji'pe lema'a. I'que o'Poujna imanc'
jouc'a ihniya. Tixinnilhuo' jahuay
anuli, ja'ni amozó ja'ni apoujnalá.

¹⁰Jahuay imanc'
camilhuo': Tipangola' itsiya
aimitafqueconayacolhuo'. Joupa
epenufpolhuo' la'Poujna, acueca'
icueya limane i'que, acueca'
lo'epa. ¹¹To'on'hicotsot'si to lan
soldado, ihne lisoldado LanDios.
To'po'notso'tsi lo'pa'necoyaco'tsi,
i'le lapi'ipolhuo' LanDios. To'ta'a
to'cuanajco'mo'tsi, lonta'a Satanás

aimi'ya mulijyacolhuo'. Tama
juaiconapa a'ijc'a lipicuejma', tama
tehuay te co'e'eyacolhuo', aimi'ya
mi'eyacolhuo'.

¹²Ji'pe lema'a, xonca al 'ocay,
timana' lixcay contahue. Ihne icueya
li'lane, ticuxeyi. Ticuxennila'
lan tsila' quincuxepa nomana' fa'a
li'a lamats', ihne lincuxepá pet'si
amuf hi'picuejma'. A'on'hiyo'tsi
cafxi lontahue, a'i la'f'as xanuc'.

¹³To'hiya camilhuo': Tolapenufle
jahuay lapi'ipolhuo' LanDios,
to'po'no'itso'tsi. Ticuait'si litine
xonca ipime to'cuanajco'mo'tsi.
Aimulijconayacolhuo'. Tijoula'
lafuleya ti'hua to'cuanajco'mo'tsi.

¹⁴Camilhuo': Ate'a to'po'no'itso'tsi
jahuay lapi'ipolhuo' LanDios.
Tolacaxo'la'ite, to'cuanajco'tso'tsi.
To'po'no'itso'tsi jahuay ihna'a
laicuicomma cal soldado. I'que
ipic'a tifi'ecoxoxi. He lohuocopoxi
tepi'i lipujfxi. Imanc' lo'nespa al
hinca ti'on'cospa to lo'huocoyo'tsi,
lapi'ipolhuo' lo'pufjxi.

Jouc'a tipa'a licoraza. Ma' anuli
imanc' tipa'a lo'coraza. He al hijca
lon'epa, tipa'ne lo'lunxajma'.

¹⁵Tipa'a hic'ejí, ti'hua'la' o
tecaxla' al c'a. Aimixcaiya,
aimipaif'quiya. Jouc'a imanc'
to'comma to tipa'a al c'a lo'c'ejí.
Imanc' Lataiqui' lolapenufpa, i'le
tuya'e: "Aimo'suel'me'ona'me.
LanDios aimixtuc'oconayacolhuo'."
He Lataiqui' joupa ifa'epolhuo'
lo'picuejma'. Lonta'a Satanás
aimipaif'eyacolhuo'.

¹⁶Jahuay ihna'a cal soldado
tixhuico'ma. Jouc'a ticuicomma
ti'no'ha' li'escudo, tipa'neco'moxi
al c'a. Imanc' i'le lo'huaiyijmpa

Jesucristo ti'onłcospa to co'escudo. Teca'nitsola' łepof' lonajpola' łixcay conta'a Satanás, iħe lo'escudo tipic'e'mola'. Tijoułta' ailopa'a co'eyacolhuo'.

¹⁷Jouc'a tipa'a licasco, lopa'necopa łijuac. Imanc' moł'nujuaisyi tunłu'e'molhuo' Cristo tocomma to tipa'a lołcasco.

Jouc'a tipa'a lo'espada. Iħe Litaiqui' ŁanDios, loxhuicopa cal Espřitu Santo.

¹⁸Camilhuo': Tołta'a tołacaxołaiħe, tołcuanajcotsolłsi, ti'hua tołpalaic'ołe ŁanDios. Ti'hua tołsa'hueħe titoc'itsolhuo'. Ja'ni tołuyalaicoyi al c'a o a'ijc'a loluyalaicopa, tołpalaic'ołe ŁanDios. Tołmiħe lomipolhuo' cal Espřitu Santo. Tołpo'nołe cuenna. Aimixojtolhuo', ti'hua tołpalaic'ołe ŁanDios. Tołsahue'ħe titoc'itsola' jahuay lołpimaye, iħne jouc'a i'huexi ŁanDios.

¹⁹Mołsa'hueyi tołta'a, tołsa'hueħe ŁanDios ałtoc'iħa' iya'. Lapi'iħa' laifnesya. Tołta'a ma cuya'e' aimalahue'eya lataiqui'. Tixoj'ma

neta cuhuałna'ma Lataiqui'. Lan xanuc' ti'iħa' quılısina' te ts'i'ic' loya'apa iħe lemiya jilpe Lataiqui'. ²⁰Iya' epaluc Jesucristo. Alummepa cuya'ała' iħe lataiqui'. Petsi aiqusetenłcocola' iħe laifnuya'apa ałtats'ecopa. Totiya ałfi'ecompa atejma'. Cacua: Tołsahue'ħe ŁanDios lapi'iħa' laifnesya. Tołta'a aicaxinya calaic'ata. Ma to ts'ipic'a ŁanDios, tołta'a capalaıħa'.

²¹Cacua: Ti'iħa' cołsina' jouc'a te ts'i'ic' iya' laifnuyaicopa fa'a. Totiya ti'hua'ma Tıquico. Iħque łacaipima, ac'a ti'ay lanic' lepi'ipa łalPoujna, tu'itolhuo' jahuay la'ıpa. ²²Cumme'ma tu'itsolhuo' te ts'i'ic' małmana'. Tixpai'itsolhuo' cunlata.

²³ŁanDios cał'Aılli', jouc'a łalPoujna Jesucristo tipac'e'etsola' liłpicuejma' lapimaye nomana' jilpiya. Titoc'itsola' ti'entsołłsi capic'a, ti'hua ti'huaiyijnle. ²⁴Iħne petsi aimipai'iyolłsi, ti'hua ti'eyi capic'a łalPoujna Jesucristo, ŁanDios tipaxnetsola', titoc'itsola' jahuay iħniya.